

Ważna protokolowa notica

Runje džensa před 25 lětami, 31. awgusta 1990, staj tehdyši zwjazkowy nutrkowny minister Wolfgang Schäuble a tehdyši statny sekretar NDR Günther Krause (wobaj CDU) we wuchodnym Berlinje zjednoćenske zrěčenje podpisałoj. „Zrěčenje mjez Zwjazkowej republiku Němskej a Němskej demokratiskej republiku wo zjednoćenju“ je w 45 artiklach a tójšto přiwickach ze zjednoćenjom Němskeje zwjazane prašenja zdžěla jara nadrobnje rjadowało. Za to trjebachu 900 stron. Jednanja běchu so 6. julija zahajili, trajachu potajkim runje wosom tydzenjow. Ze zrěčenjom so płaćiwosć Zakładneho zakonja ZRN na teritorij NDR rozšěri. Ze 14 wobwodow NDR wutworichu pjeć nowych zwjazkowych krajow Braniborsku, Mecklenburgsko-Předpomorsku, Saksku, Saksko-Anhaltsku a Durinsku. W zrěčenju zakótwichu, zo přewozmjje zwjazkowa republika zamóženje NDR runje tak kaž jeje dołh. Nimo toho rjadowachu zarjadnistwo krajow. Zwjazkowy sejm a ludowa komora stej zrěčenje 20. septembra z wjetšinu schwailoj.

Takrjec w poslednim wokomiku so zastupnikam Serbow – Mari Michałkowej a Bjarnatej Cyžeje – poradzi, zapodać dokument, kotryž prawa słowjanskeje mjeńšiny w zjednoćenej Němskej rjaduje. Papjeru jako „protokolowu noticu k artiklej 35“ připowěsnychu. W dokumenće mj. dr. rěka: „Zachowanje a dalewuwiće serbskeje kultury a serbskich tradicijow so zaruči. Přisłušnicy serbskeho ludu a jich organizacijow maja swobodu, pěstować a zachować serbsku rěč w zjawnym žiwjenju.“ Zhladujo na tehdyše podawki Marja Michałkowa měni: „Wospjet sym so Günthera Krausu prašala, hač je so w jednanjach wo zjednoćenju Němskeje tež wo Serbach rěčalo, tola hakle na předposlednim posedženju so to sta. Tam protokolowu noticu jako kulturne herbstwo přiwezachu. Wona twori hišće džensa zakład jednanjow mjez Zwjazkom a krajomaj Braniborskej a Sakskej wo financowanju Założby za serbski lud. Ze zrěčenjom je so Zwjazk zawjazal, kulturu, rěč a tradicije Serbow dołhodobnje spěchować.“ ■ MkWj